



Gian Luca Palmisano in ün simulatur da cursa professiunel a Turich.

FOTOS MAD

Las duos vitas dal postin da Samedan

Ils uschè numnos e-sports – concurrenz da divers gös digitels sün consolas e'l PC – sun i'ls ultims ans gnieu adüna pü populers. Cun Gian Luca Palmisano, chi abita a S-chanf, ho l'Engiadina intaunt eir ün atlet digital, chi fo part d'üna squadra tudas-cha per cuorsas dad auto sül computer.

MARTIN CAMICHEL/FMR

Düraunt il di es Gian Luca Palmisano (26) traunter oter in gir süllas via da Samedan e da San Murezzan fin Malögia scumpartand la posta. Il mneder suppleant da la posta a Samedan es però eir zieva la lavur in viedi cun l'auto. Invezza da's schaschiner tres las giassa engiadinaisas, fo el cuorsas süls grands percurs d'auto mundiels. Almain in möd digital.

«Da tuot las categorias d'auto do que differentas cuorsas e ligas e que as nomna Sim Racing. Eau sun circa daspö tschinch fin ses ans ch'eu sun da la partida e fatsch diversas cuorsas online», disch Gian Luca Palmisano. Scu cha l'esperienza da Gian Luca Palmisano es creschida i'ls ultims ans, uschè s'ho eir sviluppo sieu cockpit a chesa. Cumanzo vaiva nempe tuot cun ün s-chabè plajabel ed üna rodina da manascher, ün gas ed ün frain. «Que guardaiva ün pô oura ün pô scu ün giachaditsch», s'algorda Gian Luca Palmisano cun ün surrier. Intaunt es tuot sieu equipamaint però gnieu bger pü professiunel – e l'e-sportler fo daspö l'an passo eir part d'üna squadra tudas-cha, chi fo insembel diversas cuorsas e concurrenz da Sim Race.

Dal go-kart al Sim Race

Gian Luca Palmisano ho però eir già da pitschen sü ramasso experienzas illa realited sün pistas da cursa. Cun ses ans ho el nempe cumanzo ad ir cul go-kart. El es creschieu sü a Zuoz cun üna mamma indigena ed ün bap da l'Italia dal Süd. «Illas vacanzas d'eiri adüna in gir cul go-kart in Italia. Ma que nu daiva bgeras pussibiliteds da trener in Engiadina ed alura d'heja schmiss cun que, eir sch'eu d'eira magari bun», disch Gian Luca Palmisano. El agiundscha cha que saja eir sto üna dumanda dals cuosts – per 30 fin 40 rundas cuostaivan ils pneus intuorn 300 euros – e ch'el s'hegia perque tschercho ün'alternativa.

Uschè s'ho la carriera da cursa da l'Engiadina spustada i'l muond digital, cur ch'el ho cumanzo ad fer cuorsas i'l gö «Grand Turismo Sport» sülla Playstation. Svelt ho'l bado ch'el es eir bun illa concurrenz digitel dad ir cun l'auto. El disch: «Eir scha Grand Turismo Sport es fich realistic, nun es auncha tuot propi accurat a la realited – scu p.ex. il frener. Perque d'heja müdo simulaziun, d'he cumpro ün PC e'm d'he miss in tschercha d'üna cumpetiziun online pü realistica.»

Chatto üna squadra

A la fin es l'e-sportler rivo tar la simulaziun cul nom «iRacing» – il gö principel da Sim Racing – e s'ho fat düraunt ils ultims passa quatter ans bgers contacts i'l muond digital dal e-sport. «Eau sun gnieu rendieu attent d'ün cuntshaint



L'equipamaint da simulaziun per las cuorsas d'auto online cha Gian Luca Palmisano ho tar se a chesa.

a la pussibilitad da fer part d'üna squadra ch'el cugnuscha. Eau d'he scrit als responsabels ed els d'eiran fich interessos», declera Gian Luca Palmisano. L'an passo ho alura cumanzo sia carriera illa squadra Alemannia Aachen eSports.

Zieva ün temp da prouva düraunt la sted 2023 es el alura gnieu piglio sü illa squadra permanente da Sim Racing dad Alemannia Aachen eSports. «Mincha lündeschdi vaina tschantedas online da la squadra per coordiner las cuorsas. Que do cuorsas da 12 e 24 uras cha's fo scu squadra da quatter fin tschinch e-sportlers. Alura fo minchün var ses uras sias rundas», declera Gian Luca Palmisano. L'avantag d'esser part da la squadra es il sustegn illa raits socielas, üna carta d'autogram digitela, l'organizaziun da las cuorsas e natürelmaing ils contacts.

Equipamaint professiunel

Sieu equipamaint consista intaunt da quatter monituors e tuot ils indrizs da simulaziun sun sün ün nivel professiunel. Scu cha Gian Luca

Palmisano disch ho'l investieu var 10 000 francs in sieu set-up. «Scha's do oura uschè ün grand import, alura as stu fer que eir gurent. Eau trenesch perque schont quasi minchadi», uschè il e-sportler.

Ma na be sün quel equipamaint a chesa fo el cuorsas per sieu squadra Alemannia Aachen eSports, eir in simulatuors professiunels a Turich es el in gir cun l'auto da cursa. Lo do que lounges cun var desch da quels simulatuors. Per quellas cuorsas s'ho tenor Gian Luca Palmisano scu prüm da's qualifier ed alura as po ir a Turich als finels. In quels finels as po eir guadagner raps, tuot tenor che liga e che cumpetiziun fin a 3500 francs per cursa. «Ils e-sports vegnan adüna pü grands e pü renunos. Da fer ün di üna egna squadra engiadinaisa füs ün grand sömni. Eir per am chat-ter cun la gliעד, perche cha fin ad Aachen d'heja bod nouv uras cun l'auto», uschè Gian Luca Palmisano. E sch'el pudess «s'insömger grand», alura vulesa'l ün di eir avrir üna tela lounge scu a Turich, ma cò in Engiadina.

ZERNEZ

Bal da la Pro Senectute

Il prossim bal da la Pro Senectute ha lö in sonda, ils 27 schner 2024 in l'Hotel a la Staziun a Zernez. Las senioras e'ls seniors da la regiun sun invidats a passantar ün pèr uras insembel. Sco cha la Pro Senectute scriva in üna comunicaziun, vain il bal accumpagnà musicalmaing da la Chapella Alp Laret, chi suna da las 14.00 fin las 17.00. La Pro Senectute invida amiaivelmaing a tuots e tuottas a star da cumpagnia, tadlar la bella musica e far ün per trais-chas insembel. Ma eir da revair divers amis e cuntshaints da la giuventüna, chi nu s'ha plü vis daspö blers ons. Per daplü infurmaziun contactar a Claudio Filli sün 079 871 77 24. (cdm/fmr)



La Pro Senectute invida a bal in l'Hotel a la Staziun a Zernez.

FOTO MARTIN CAMICHEL

LA QUOTIDIANA

Editura: Samedia Press AG

Editur: Hanspeter Lebrument

CEO: Thomas Kundert

Editura Samedia

Via Sommerau 32, 7007 Cuira;

tel. 081 255 50 50,

mail: verlag@samedia.ch

Redacziun responsabla:

Fundaziun Medias Rumantschas (FMR):

Schefredactor FMR: David Truttmann (dat)

Substitut schefredactor FMR:

Hans Huonder (hh)

Redacziun FMR:

Augustin Beeli (abc), Andreas Cadonau (ac),

Daniela Derungs (dd), Flurin Andry (fa, correctorat),

Gabriela Desax (gd, correctorat), Claudia Cadruvi (vi)

Gabriela Riedi (ri); Madlaina Capeder (mc, correctorat),

Sandra Balzer (sab), Martin Gabriel (mg),

Martin Camichel (cam), Sandro Buchli (sb),

Stefanie Elsa (ste), Annetta Janka-Zini (aj),

Luisa Cadonau (lu)

Adressas redacziunals:

FMR Fundaziun Medias Rumantschas,

Via da Masans 2, 7000 Cuira

mail: redacziun@fmr.ch

tel. 081 544 89 11

www.fmr.ch

Servetsch d'abunents e da distribuziun:

Via Sommerau 32, 7007 Cuira,

tel. 0844 226 226,

mail: abo@samedia.ch

Inserats:

Samedia Promotion,

Städtlistrasse 12, 7130 Glion

tel. 081 920 07 17, fax 081 920 07 18,

mail: ilanz.inserate@samedia.ch

La Quotidiana cumpara tschintg giadas ad emna.

Ediziun derasada, Südstschweiz compleet:

62 586 exemplars (WEMF, 2023),

da quai ediziuns vendidas 58 113 exemplars

Derasaziun: 131 000 lecturas e lecturas

(MACH-Basic 2022-2)

La Samedia Press AG è possessura dals titels

«Fögl Ladin», «Gasetta Romontscha», «Casa

Paterna/La Pünt» e «La Vouch da Surmeir».

Pretschs d'abunaments sut:

www.suedostschweiz.ch/aboservice

Comunicaziun da participaziun considerabla

sin fundament da art. 322 CP:

nagin

© Samedia